

Vien de la páxina anterior

-Asturies tien dalguna semeyanza con Virxinia Occidental. Pémeque la industria y el comerciu na estaya rural hai décadas que ta al debalu. Los Kennedy quedaron ablucaos pola prohibitú n'EE UU nos años 60. Enfotáronse en facer que la xente xurdiera de la prohibitú n'estaos como Virxinia Occidental. Pero'l resultáu foi menos auto-suficiencia. Los qu'abenayá sallaben na llosa, agora sallaben les files del paru. Asina que nun cuidu que les perres del Gobiernu seyan la solución a llargu plazu. Hai que facer que medre l'actividá empresarial y sofitar la inter-dependencia en cuenta de la dependencia.

N'Asturies, al mio parecer, el Gobiernu del Principau tien mercao a tolos axentes sociales, dende los que nun tienen trabayu a los prexubilaos y los estudiantes. Una rede social que sirva d'ayuda a xente en transición ye pernecesaria -pero cuidu que cuando va pa llargo, fai argayar l'espíritu individual de la xente y los planes pa meyorar nel futuru. Hai tiempu que me pregunto sin nun ye que los asturianos ellos mesmos ponen torques a la so visión. La economía asturiana xurdió de la dictadura de Franco en manes del Estáu. Esi sistema paternalista dába-yos un altu nivel de seguridad. Tou taba perguapu del momentu que fueres a misa y nun dixeres nada. Pero esa seguridad

tien un preciu pergrande: la ineficiencia económica. Esti tipu d'economía nun ye competitivu nun mundu globalizao. Nun ye namái'l Gobiernu; tamién los sindicatos xueguen un papel dañín sofitando esa ineficiencia. Los políticos asturianos combayen cola xente pa ganar votos y caltenese nel poder. Fain lo mesmo que Franco.

-¿Qué igua daríes-y a Asturias?

-Parte del problema ye que los partíos políticos n'Asturies tán baxo'l control d'un garrapiellu de xente.

«Dientro o fuera d'Asturies la xente mozo siente noxu col Gobiernu».

Eso quier decir que'l partíu (y por extensión, Asturias) nun saca cacia de la intelixencia colectivo, que va mucho más alló de la que pueda tener un únicu individuu. Seique habrá un cambéu positivu cuando toos faigan un alderique seriú de cuala ye la visión de futuru p'Asturies. Cuidu que la solución va ser menos beneficios sociales xunto col espoxigue de la iniciativa personal y l'actividá empresarial. Tamién toi seguru que la solución nun va venir nin de la derecha nin de la izquierda. El secretu de toa democracia nun ye que s'escueya al

mejor xefe, sinón que se moderen los extremos. La xente con idegues asemeyaes, nun importa lo intelixente que seya, nun van atopar la mejor igua por ello. La mejor igua, la más eficiente, ye cuando caún -colos sos intereses estremaos- participa nel procesu abiertamente.

-Como inxenieru social y diseñador de webs, ¿nun te prestaría abrir una empresa tecnolóxica n'Asturies?

-¡Nun sabes lo que me prestaría! Encantaríame tar n'Asturies p'aidar nel espoxigue de la economía y tamién de la cultura. Pero claro, nel terrén cultural yo nun sedría más qu'un escolín...

-Hai poco qu'afitasti un filu de palabreru asturianu n'AsturianUS.org. ¿Cómo va'l to deprendizaxe de la llingua?

-Altraviés del mio trabayu con delles webs asturianas y cola «Pallabra selmanal n'asturianu» qu'afitáramos a AsturianUS.org, yá tengo deprendíes una riestra curiosa de palabres. Agora soi quien a lleer una migaya, pero inda tengo muchu camín pa poder soltame. Eso faime recordar la primer vegada que falara n'asturianu colos mios primos. Tábemos xintando en casa d'ellos n'Avilés cuando m'entrugaron si quería repetir el platu. Yo dixérayos: «¡Toi fartucu!» Entós miraren pa min ensin dicir nada. Y depués, muertos de risa, preguntaron: «¿Aú deprendieras eso?».

POLÍTICA

IX-BA-Verdes promete subir el presupuestu de cooperación

Jesús Iglesias, candidatu d'IX-BA-Verdes a la presidencia d'Asturies y coordinador xeneral d'Izquierda Xunida d'Asturies, tuvo un alcuentru cola presidenta de la Coordinadora d'ONGD, Ana Suárez, nel qu'analizaron les propuestas de cooperación al desarrollu de la plataforma, pa la so incorporación al programa electoral de la coalición. Na reunión, Jesús Iglesias comprometióse a subir la partida presupuestaria destinada a esta materia hasta llegar a un 1% del presupuestu asturianu y a afondar na Llei de Cooperación al Desarrollu. Pa con ello, IX va plantear na próxima lexislatura la creación d'un Fondu Asturianu de Cooperación qu'aglutine los recursos que les alministraciones autonómica y local destinen a l'ayuda internacional p'afrontar proyectos conxuntos.

Pela so parte, Ana Suárez presentó a Jesús Iglesias los dos documentos firmaos poles organizaciones que conformen la Coordinadora d'ONGD d'Asturies, «Por un Pacto Asturianu contra la Pobreza» y el «Código Ético para la Ayuda al Desarrollu», esti últimu ellaboráu cola Axencia Asturiana de Cooperación al Desarrollu.

ELECCIONES

UNIDÁ denuncia al alcalde de Siero por «delitu electoral»

UNIDÁ denunció esta selmana énte la Xunta Electoral al PSOE de Siero y al alcalde del conceyu, Juan José Corrales, por un presuntu delitu electoral. L'escritu presentáu pola coalición qu'agrupa a Andecha Astur, Izquierda Asturiana y Los Verdes-Grupu Verde denunció l'unviu d'una carta y un llibru a los vecinos de Siero residentes nel estranxeru «con clara intención electoralista», al manifestar nella l'alcaide'l so deséu de «que nun sía la última». Por esta razón, UNIDÁ solicitó a la Xunta Electoral «que se sancione a los sos responsables pola comisión d'actuaciones contraries al espíritu y la lletra de la lexislación en materia electoral».